

四庫全書

子部

欽定四庫全書

冊府元龜卷六百九十三 宋王欽若等撰

牧守部

武功

自秦分天下為三十六郡而守尉皆領兵至晉武平吳去州郡武備其後盜賊四起以至大亂山濤之論精矣若乃百城提封之廣比屋士民之富或因歲凶荒嘯聚不逞合烏鳥之衆弄潢池之兵竊法干紀敢行稱亂至

於邊城候望之所羌戎走集之地或伺間而入寇或屬國之內叛烈火燎原當急圖于撲滅農夫去草非可使其滋蔓盖有乘其便宜不暇中覆率厲士衆摧鋒致討震耀國威攘除民患固已名載勲籍事藏策府其或鄰敵接畛申嚴警備拒戰而克勝交侵而大獲者其績亦茂矣詩云干城傳云保障皆是之謂歟

漢朱買臣武帝時召待詔會東越數反覆買臣因言故東越王居保泉山一人守險千人不得上今聞東越王

更徙處南行去泉山五百里居大澤中令發兵浮海直指泉山陳舟列兵席卷南行可破滅也帝拜買臣會稽太守居歲餘買臣受詔將兵與橫海將軍韓說等俱擊破東越有功徵入為主爵都尉

田廣明為淮陽太守歲餘故城父令公孫男與客胡倩等謀反倩詐稱光祿大夫從車騎數十言使督盜賊止陳留傳舍太守謁見欲收取之廣明覺知發兵皆捕斬焉

陳立為牂牁太守立臨邛人前為連然長不韋令

皆益州縣

也蠻夷畏之及至牂牁諭告夜郎王興不從命立請誅

之未報乃從吏數十人出行縣至興國且同亭召興

將數千人往至亭從邑君數十人入見立立數責因斷

頭邑君曰將軍誅亡狀為民除害願出曉士眾以興頭

示之皆釋兵降

釋解以降

鈎町王禹漏卧侯俞震恐入粟千

斛牛羊勞吏士立還歸郡興妻父翁指與子邪務收餘

兵迫脅旁二十二邑反至冬立奏募諸夷與都尉長史

分將攻翁指等翁指據阨為壘立使騎兵絕其饋道從  
反間以誘其衆都尉萬年曰兵久不決費不可共引兵  
獨進敗走趨立營立怒叱戲下令格之都尉復還戰立  
引兵救之時天大旱立攻絕其水道蠻夷共斬翁指持  
首出降立已平定西夷徵詣京師

趙護為河東都尉成帝鴻嘉中廣漢男子鄭躬等六十  
餘人攻官寺募囚徒盜庫兵自稱山君黨與寢廣犯歷  
四縣衆且萬人拜護為廣漢太守發郡中及蜀郡合三

萬人擊之或相捕斬除罪

賊黨相捕斬而  
來者赦其本罪

旬月平遷為

執金吾賜黃金百斤

嚴訢為汝南太守永始三年山陽鐵官徒蘇令等二百  
二十八人攻殺長吏盜庫兵自稱將軍經郡國十九殺  
東郡太守汝南都尉遣丞相長史御史中丞持節督趣  
逐捕訢捕斬令等遷為大司農

後漢耿况為上谷太守更始時五校賊二十餘萬北寇  
上谷况與子舒連擊破之賊皆退走建武初漁陽太守

彭寵反征虜將軍祭遵屯良鄉縣名屬涿郡驍騎將軍劉喜

屯陽鄉

縣名故城在今幽州故安縣西北

以拒寵寵遣弟純將匈奴二

千餘騎寵自引兵數萬分為兩道以擊遵喜胡騎經軍

都

縣名屬廣陽郡有軍都山在西北

舒襲破其衆斬匈奴兩王寵乃退

走況復與舒攻寵取軍都

鉞期為虎牙大將軍建武初檀鄉五樓賊入繁陽內黃

縣名繁陽在今相州內黃在西北

又魏郡大姓數反復而更始將卓京

京一作原謀欲相率反鄴城帝以期為魏郡太守行大將軍



事期發郡兵擊卓京破之斬首六百餘級京亡入山追  
斬其將校數十人獲京妻子進擊繁陽內黃復斬數百  
級郡界清平

鮑永為諫議大夫建武初董憲裨將屯兵於魯侵害百  
姓乃拜永為魯郡太守永到擊討大破之降者數千人  
寇恂建武初為河內太守坐繫考上書者免是時潁川  
人嚴終趙敦聚眾萬餘與密人賈期連兵為寇恂免數  
月復拜潁川太守與破奸將軍侯進俱擊之數月斬期

首郡中悉平

陳俊為瑯邪太守建武八年張步既降步將妻子逃奔臨淮與弟弘監欲招其故衆乘船入海俊追擊斬之

王霸為上谷太守建武九年領屯兵捕虜無拘郡界

限拘

也明年霸與吳漢等四將軍六萬人出高柳擊賈覽詔

霸與漁陽太守陳訢將兵為諸軍鋒匈奴左南將軍將數千騎救覽霸等連戰於平城下破之追出塞斬首數百級十三年將弛刑徒起亭障自代至平城三百餘里

凡與匈奴烏桓大小數十百戰

祭彤為遼東太守有勇力能貫三百斤弓虜每犯塞常為士卒先數破走之建武二十一年秋鮮卑萬餘騎寇遼東彤率數千人迎擊之自被甲陷陳虜大奔投水死者過半遂窮追出塞虜急皆棄兵裸身散走斬首三千餘級獲馬數千匹自是後鮮卑震怖畏彤不敢復闕塞明帝永平元年彤使鮮卑擊赤山烏桓大破之斬其渠

帥

赤山在遼東西北數千里

廉范永平中為雲中太守會匈奴大入塞烽火日通故事虜入過五千人移書傍郡吏欲傳檄求救范不聽自

率士卒拒之虜衆盛而范兵不敵會日暮令軍士各交

縛兩炬三頭藝火營中星列

用兩炬交縛如十字藝其三頭手持一端使敵人望

疑兵士之多也虜遙望火多謂漢兵救至大驚待旦將退范乃

令軍中蓐食晨往赴之

蓐食早起食于寢蓐中也

斬首百級虜自相

犇藉死者千餘人

犇藉也藉相犇藉也

繇此不敢復向雲中

耿夔為遼東太守和帝元興初貊人寇郡界夔追擊斬

其渠帥

王堂拜巴郡太守安帝永初中回羌寇郡堂馳兵赴賊  
斬虜千餘級巴庸清靜吏民生為立祠

法雄為青州刺史永初三年海賊張伯路等寇海濱雄  
與御史中丞王宗并力討之連戰破賊斬首溺死者數  
百人餘皆奔走收器械財物甚眾會赦詔到賊猶以軍  
甲未解不敢歸降於是王宗召刺史太守議皆以為當  
遂擊之雄曰不然兵凶器戰危事勇不可恃勝不可必

賊若乘船浮海深入遠島攻之未易也及有敕令可且  
罷兵以慰誘其心勢必解散然後圖之可不戰而定也  
宗善其言即罷兵賊聞大喜乃還所畧人而東萊郡兵  
獨未解甲賊復驚恐遁走遼東止海島上五年春乏食  
復抄東萊間雄率郡兵擊破之賊逃還遼東遼東人李  
文等共斬平之於是州界清靜

楊璇為零陵太守是時蒼梧桂陽猾賊相聚郡縣賊眾  
多而璇力弱吏人憂恐璇乃特制馬車數十乘以排囊

盛石灰於車上繫布索於馬尾又為兵車專設弓弩尅  
共會戰乃令馬車居前順風鼓灰賊不得視因以火燒  
布然馬驚奔突賊陣因使後車弓弩亂發鉦鼓鳴震羣  
盜波駭破散追逐傷斬無數梟其渠帥郡境以清

王衡為吳郡太守順帝永和三年郡丞羊珍反攻郡府  
衡破斬之

張綱為御史漢安元年廣陵賊張嬰等眾數萬人殺刺  
史二千石寇亂揚徐間積十餘年朝廷不能討梁冀乃

諷尚書以綱為廣陵太守因欲以事中之前遣郡守率  
多求兵馬綱獨請單車之職既到乃將吏卒十餘人徑  
造嬰以慰安之求得與長老相見申示國恩嬰初大驚  
既見綱誠信乃出拜謁綱延置上坐問所疾苦乃譬之  
曰前後二千石多肆貪暴故致公等懷憤相聚二千石  
信有罪矣然為之者又非義也今主上仁聖欲以文德  
服叛故遣太守思以爵祿相榮不願以刑罰相加今誠  
轉禍為福之時也若聞義不服天子赫然震怒荆揚究



豫大兵雲合豈不危乎若不料彊弱非明也棄善取惡非智也去順效逆非忠也身絕血嗣非孝也背正從邪非直也見義不為無勇也六者成敗之幾利害所從公其深計之嬰聞泣下曰荒裔愚人不能自通朝廷不堪侵枉遂復相聚偷生若魚游釜中喘息須臾間耳今聞明府之言乃嬰等更生之辰也既陷不義復恐投兵之日不免孥戮綱約之以天地誓之以日月嬰深感悟乃辭還營明日將所部萬餘人與妻子面縛歸降綱乃單車

入嬰壘大會置酒為樂散遣部眾任從所之親為卜居宅相田疇子弟欲為吏者皆引召之人情悅服南州晏然朝廷論功當封梁冀過絕乃止天子嘉美徵欲擢用綱而嬰等上書乞留乃許之

魏朗為九真都尉先是九真賊起朗到官獎勵吏兵討破羣賊斬首二千級桓帝美其功徵拜議郎

度尚為右校令延熹中長沙零陵賊七八千人自稱將軍又豫章艾縣六百餘人應募而不得賞直遂反謁者

督州郡討之不能尅乃擢尚為荊州刺史尚躬率部曲與同勞逸廣募雜種諸蠻夷明設購賞進擊大破之降者數萬人出兵二年羣寇悉定後遷遼東太守數月鮮卑率兵攻尚與戰破之戎狄憚畏

李顯巴郡人為太尉掾延熹五年益州郡諸夷反叛執太守雍陟遣御史中丞朱龜討之不能尅朝議以為郡在邊外蠻夷喜叛勞師遠役不如棄之顯建策討伐乃拜顯益州太守與刺史龐芝發板楯蠻擊破平之還得

雍陟顯卒後夷人復叛以廣漢景毅為太守討定之

陳奉為桂陽太守延熹六年桂陽盜賊李研等寇郡界  
奉與戰大破降之

陸康為議郎會廬江賊黃穰等與江夏蠻夷結十餘萬人  
攻沒四縣拜康廬江太守康申明賞罰擊破穰等餘  
黨悉降

張堪為漁陽太守匈奴嘗以萬騎入漁陽堪率數千騎  
奮擊大破之郡界以靜

黃琬為豫州牧時寇賊陸梁州境彫殘琬討擊平之威聲大震

翟酺為酒泉太守叛羌千餘騎從燉煌來鈔郡界酺赴擊斬首九百擊羌衆幾盡威名大震

皇甫規為泰山太守初規以詩易教授時泰山賊叔孫無忌侵亂郡縣中郎將宗資討之未服公車特徵規拜太守規到官廣設方畧寇虜悉平

臧旻為揚州刺史時會稽妖賊許昭起兵句章自稱大

將軍立其父生為越王攻破城邑衆以萬數旻率丹陽太守陳寅擊昭破之昭遂復更屯結大為人患旻等進兵連戰三年破平之獲昭父子斬首數千級

夏育為北地太守會鮮卑入寇育率休著屠各追擊破之遷育為護烏桓校尉

耿臨為玄菟太守靈帝建寧二年高句麗王宮死子伯固立臨討之斬首虜數百級伯固降屬遼東

朱雋為交阯太守先是雋為蘭陵令光和元年合浦交

陟烏濟蠻叛招引九真日南民攻沒郡縣而交陟部羣賊並起牧守輒弱不能禁又交陟賊梁龍等萬餘人與南海太守孔芝反叛攻破郡縣即拜儁刺史令過本郡簡募家兵及所調合五千人分從兩道而入既到州界按甲不前先遣使詣郡觀賊虛實宣揚威德以震動其心既而與七郡兵俱進逼之遂斬梁龍降者數萬人旬月盡定以功封都亭侯千五百戶賜黃金五十斤四年儁討交陟合浦烏濟蠻破之後為太僕賊帥常山人張

燕寇河內逼京師於是出僞為河內太守將家兵擊却之

王允中平元年為侍御史黃巾賊起特選拜豫州刺史辟荀爽孔融等為從事上除禁黨討擊黃巾別帥大破之與左中郎將皇甫嵩右中郎將朱儁等受降數十萬

何苗為河南尹中平四年滎陽賊數千人羣起故燒郡縣殺中牟縣令詔苗出擊之苗攻下羣賊平定而還

初續為廬江太守揚州黃巾賊攻舒州焚燒城郭續發



縣中男子二十已上皆持兵勒陳其小弱者悉使負水

灌火會集數萬人并勢力戰大破之郡界平後安風

安風

縣屬廬江郡

賊戴風等作亂續復擊破之斬首三千餘級生

獲渠帥其餘黨輩原為平民賦與佃器使就農業中平

三年江夏兵趙慈反叛殺南陽太守秦頡攻沒六縣拜

續為南陽太守發兵與荊州刺史王敏共擊慈斬之獲

首五千餘級屬縣餘賊並詣續降續為上言宥其枝附

劉虞為幽州牧前中山相張純叛入烏桓與烏桓峭王

等攻破清和平原虞到州罷省屯兵務廣恩信遣使告  
峭王等以朝恩寬弘開計善路又設賞購純走出塞餘  
皆降散純為其客王政所殺函首詣虞北州乃定

李章為瑯邪太守時北海安邱大姓夏長思等反遂囚

太守處興

處姓也

而據營陵城章聞即發兵千人馳往擊

之掾史止章曰二千石行不得出界兵不得擅發章按  
劍怒曰逆虜無狀囚劫郡守此何可忍若坐討賊而死  
吾不憾也遂引兵安邱城下募勇敢燒城門與長思戰

斬之獲三百餘級得牛馬五百餘頭而還興歸郡以狀上聞悉以所得頒勞軍士

陶謙為陽武都尉會徐州黃巾起以謙為徐州刺史擊黃巾破走之

應劭為泰山太守黃巾賊三十萬衆入郡界劭糾率文武連與賊戰前後斬首數千級獲生口老弱萬餘人輜重二千兩賊皆退却郡內以安

魏董昭漢末為魏郡太守時郡界大亂賊以萬數遣使

往來交易市買昭厚待之因用為間乘虛掩討輒大克破二日之中羽檄三至

滿寵漢末為許令時袁紹盛於河朔而汝南紹之本郡門生賓客布在諸縣擁兵拒守太祖憂之以寵為汝南太守寵募其服從者五百人率攻下二十餘壁誘其未降渠帥於坐上殺十餘人一時皆平得戶二萬兵三千人令就田業

陳登為廣陵太守吳孫權圍之登令功曹陳矯求救於

太祖太祖乃遣赴救吳軍既退登多設間伏勒兵追奔  
大破之

鄭渾為左馮翊時梁興等畧吏民五十餘家為寇鈔諸  
縣不能禦皆恐懼寄治郡下議者悉以為當移就險渾  
曰興等破散竄在山阻雖有隨者率脇從耳今當廣開  
降路宣諭恩信而保險自守此示弱也乃聚斂吏民治  
城郭為守禦之備遂發民逐賊明賞罰與要誓其所得  
獲十以七賞百姓百姓大悅皆願捕賊多得婦女財物

賊之失妻子者皆還求降渾責其得他婦女然後還其妻子於是轉相寇盜黨與離散又遣吏民有恩信者分布山谷告諭出者相繼乃使諸縣長吏各還本治以安集之興等懼將餘衆聚鄜城太祖使夏侯淵就郡助擊之渾率吏民前登斬興及其支黨又賊靳富等脇將夏陽長邵陵令并其吏民入磴山渾復討擊破富等獲二縣長吏將其所畧還及趙青龍者殺左內史程休渾聞遣壯士就梟其首前後歸附四千餘家繇是山賊皆平民安產業

梁習為并州刺史烏丸王魯昔叛還并州習令從事張景募鮮卑逐昔昔為鮮卑所射死始太祖聞昔叛恐其為亂於北邊會聞已殺之大喜以習前後有策略封為關內侯

何夔為長廣守牟平賊從錢眾亦數千夔率郡兵與張遼共討定之東牟人王營眾三千餘家脇昌陽縣為亂夔遣吏王欽等授以計畧使離散之旬月皆平定

蘇則為金城太守李越以隴西反則率羌胡圍越越即

請服太祖崩西平趨演叛稱護羌校尉則勒兵討之演  
恐乞降文帝以其功加則護羌校尉賜爵關內侯後演  
復結旁郡為亂張掖張進執太守杜通酒泉黃華不受  
太守辛機進華皆自稱太守以應之又武威二種胡並  
寇鈔道路斷絕武威太守毋丘興告急於則時雍涼諸  
豪皆驅畧羌胡以從進郡人咸以為進不可當又將軍  
郝昭魏平先是各屯守金城亦受詔不得西渡則乃見  
郡中大吏及昭等與羌豪帥謀曰今賊雖盛然皆新合



或有脇從未必同心因釁擊之善惡必離而歸我我增而彼損矣既獲益衆之實且有倍氣之勢率以進討破之必矣若待大軍曠日持久善人無歸必合於惡善惡既合勢難卒離雖有詔命違而合權專之可也於是昭等從之乃發兵救武威降其三種胡與興擊進於張掖演聞之將步騎三千迎則辭來助軍而實欲為變則誘與相見因斬之出以徇軍其黨皆散走遂與諸軍圍張掖破之斬進及其支黨衆皆降演軍敗華懼出所執乞

降河西平乃還金城進封都亭侯邑三百戶

賈逵為豫州刺史黃初中與諸將並征吳破呂範於洞浦進封陽里亭侯

張既為涼州刺史酒泉蘇衡反與羌豪鄰戴及丁令胡萬餘騎攻邊縣既與夏侯儒擊破之衡及鄰戴等皆降徐邈為撫軍軍師明帝時涼州絕遠南接蜀寇以邈為涼州刺史使持節領護羌校尉至值諸葛亮出祁山隴右三郡反邈輒遣叅軍及金墉城太守等擊南安賊破

之

牽招為雁門太守鮮卑大人軻比能大合騎來到故平  
州塞北招潛行撲討大斬首級

胡質為荊州刺史景初元年孫權遣將朱然等二萬人  
圍江夏郡質擊之退走

毋丘儉為幽州刺史齊王正始七年二月儉討高句驪  
五月討濊貊皆破之

王基為荊州刺史嘉平三年正月攻吳破之降者數千

人

鄧艾為兗州刺史母丘儉作亂遣健步齎書欲疑惑大衆艾斬之兼道進軍先趨樂嘉城作浮橋司馬景王至遂據之文欽以後大軍破賊於城下艾追之至邱頭欽奔吳吳大將軍孫峻等號十萬衆將渡江鎮東將軍諸葛誕遣艾據肥陽艾以與賊勢相遠非要害之地輒移屯附亭遣泰山太守諸葛緒等於黎漿拒戰逐走之

蜀霍弋為護軍時永昌郡夷獠恃險不賓素為寇害乃

以弋領永昌太守率偏軍討之遂斬其豪帥破壞邑落  
郡界寧靜

李嚴為犍為太守盜賊馬秦高勝等起事於郫合聚部  
伍數萬人到資中縣時先主在漢中嚴不更發兵但率  
將郡士五千人討之斬秦勝等首支黨星散悉復民籍  
又越雋夷率高定遣軍圍新道縣嚴馳往赴救賊皆破  
走

吳朱然字義封大帝分丹陽為臨川郡以然為太守授

兵一千人會山賊盛起然平討旬月而定

鍾離牧為南海太守高涼賊率仍弩等破掠百姓殘害  
吏民牧越界撲討旬日降服

周魴為丹陽西部都尉黃武中鄱陽大帥彭綺作亂攻  
沒屬城乃以魴為鄱陽太守與胡綜戮力致討遂生擒  
綺送詣武昌加昭義校尉

蔣欽為西部都尉會稽治賊呂合秦狼等為亂欽將兵  
討擊遂擒人狼五縣平定徙討越中郎將以合拘昭陽

為奉邑

陳表為翼正都尉嘉和中諸葛恪領丹陽太守討平山越以表領新安都尉與恪叅勢表在官三年廣開降納得兵萬餘人事捷當出會鄱陽民吳遽等為亂攻沒城郭屬縣搖動表便越界赴討以破之遽遂降陸遜拜表偏將軍進封都鄉侯

黃蓋為武鋒中郎將武陵蠻夷反亂攻守城邑以蓋領太守時郡兵纔五百人自以不敵因開城門賊半入乃

擊之斬首數百餘皆奔走盡歸邑落誅討魁帥附從者  
赦之自春訖夏寇亂盡平諸幽邃巴醴繇誕邑侯君長  
皆改操易節奉禮請見郡境遂清後長沙益陽縣為山  
賊所攻蓋又討平加偏將軍

朱治為吳郡都尉從錢唐欲進到吳吳郡太守許貢拒  
之於繇拳臣欽若等曰繇拳地名在吳郡治與戰大破之貢南就山賊

嚴白虎治遂入郡領太守事

呂岱為交州刺史時交阯太守士燮卒大帝以燮子徽



為安遠將軍領九真太守徽不承命舉兵戍海口岱於  
是上疏請討徽罪督兵三千人晨夜浮海或謂岱曰徽  
藉累世之恩為一州所附未易輕也岱曰徽雖懷逆計  
未虞吾之卒至若我潛軍輕舉掩其無備破之必也稽  
留不速使得生心嬰城固守七郡八蠻雲合響應雖有  
智者誰能圖之遂行過合浦徽聞岱至果大震怖不知  
所出即率兄弟六人肉袒迎岱岱皆斬送其首

晉王濬為益州刺史時張弘殺前刺史濬至設方畧悉

誅弘等以勲封關內侯

嵇喜初為江夏太守吳將孫遵李承率眾寇江夏喜擊破之又為徐州刺史吳故將莞恭帛奉舉兵反攻害建鄴令遂圍揚州喜討平之

吳彥代陶璜為交州刺史璜之死也九真戍兵作亂逐其太守九真賊帥趙祉圍郡城彥悉討平之

丁紹為冀州刺史到鎮率州兵討破汲桑有功加寧北將軍假節監冀州諸軍事時境內羯賊為患紹捕而誅

之號為嚴肅河北人畏而愛之

羅尚領益州刺史時李特寇成都尚據大城自守李流  
進屯江西尚懼遣使求和是時蜀人危懼並結村堡請  
命於特特遣人安撫之益州從事任明說尚曰特既凶  
逆侵暴百姓又分人散衆在諸村堡驕怠無備是天亡  
之也可告諸村密尅期日內外擊之破之必矣尚從之  
明先偽降特特問城中虛實明曰米穀已欲盡但有貨  
帛耳因求省家特許之明潛說諸村諸村悉聽命還報

尚尚許如期出軍諸村亦許一時赴會二年惠帝遣荊州刺史宋岱建平太守孫阜救尚阜已次德陽特遣蕩督李璜助任臧距阜尚遣大衆掩襲特營連戰二日衆少不敵特軍大敗收合餘卒引趣新繁尚軍引還特復追之轉戰三十餘里尚出大軍逆戰特軍敗績斬特及李輔李遠皆焚尸傳首雒陽

華譚為廬江內史時石冰之黨陸珪等屯據諸縣譚遣司馬褚敦討平之又遣別軍擊冰都督孟徐獲其驍率

以功封都亭侯食邑千戶

鄧嶽為西陽太守及蘇峻反平南將軍溫嶠遣嶽與督護王愆期鄱陽太守紀睦等率舟軍赴難峻平還郡郭默之殺劉裔也大司馬陶侃使嶽率西陽之眾討之默平遷督交廣二州軍事建武將軍領平越中郎將廣州刺史假節

鍾雅為宣城內史錢鳳作逆雅率眾屯青弋時廣德縣人周玘為鳳起兵攻雅雅退據涇縣收合士庶討玘斬

之鳳平徵拜尚書左丞

袁真為廬江太守攻合肥執南蠻校尉桑垣遷其百姓而還

王廙為廬江鄱陽二郡豫討周馥杜弢以功累增封邑任權為蜀郡太守斬苻堅益州刺史李平遂平益州

辛景為臨海太守時孫恩叛亂寇臨海景討破之恩窮感乃赴海自沉妖黨及妓妾謂之水仙投水從死者百數

劉牢之為淮陰太守妖賊劉黎僭尊號於皇丘牢之討滅之

桓冲為江州刺史桓温之破姚襄也獲襄將張駿楊凝等徙于尋陽冲在江陵未及之職而駿率其徒五百人殺江州都護趙毗掠武昌府軍將妻子北反冲遣將討獲之遽還所鎮

朱序為江夏相哀帝興寧末梁州刺史司馬勲反桓温表序為征討都護征之以功拜征虜將軍太和中遷兗

州刺史時長城人錢弘聚黨百餘人藏匿原鄉山以序為中軍司馬吳興太守序至郡討禽之事訖還兗州

周楚從父撫入蜀為鷹揚將軍健為太守父卒楚監梁益二州時梁州刺史司馬勲作逆楚與朱序討平之進冠軍將軍海西公太和中蜀盜李金銀廣漢妖賊李弘並聚眾為寇偽稱李勢子當以聖道王年號鳳凰又隴西人李高詐稱李雄子攻破涪城梁州刺史楊亮失守楚遣其子瓊討平之



杜瑗為交趾太守孝武太元五年十月九真太守李遜據交州反六年七月瑗斬遜交州平

辟閭渾為平原太守太元十七年齊國內史蔣詒殺樂安太守辟閭濬據青州反渾討平之

諸葛長民為宣城內史于時桓歆聚眾向歷陽長民擊走之

魏詠之為豫州刺史桓歆寇歷陽詠之率眾擊走之

劉謙之為始興相安帝義熙末東海人徐道期流寓廣

州無事行為僑舊所陵侮因刺史謝欣死合率郡不逞之徒作亂攻沒州城殺士庶素恨者百餘傾府庫招集亡命出攻始興謙之破走之齊平廣州誅其黨與仍行州事即以為振威將軍廣州刺史

劉敬宣為江州刺史時桓玄兄子亮自號江州刺史寇豫章亮又遣符寵寇廬陵敬宣並討平之

宋孟龍符晉末為淮陵太守與劉藩向彌征桓歆桓石康破斬之

劉懷慎晉末為徐州刺史亡命王靈秀為寇討平之

褚談為會稽太守富陽人孫法光反寇山陰談遣山陰令陸邵討敗之

徐循為寧州刺史晉寧太守爨松子反叛循討平之

劉道隆為徐州刺史司州刺史劉季之反叛道隆討斬之

薛繼孝為義州刺史雍州刺史海陵王休茂殺司馬庾深之舉兵反繼孝討斬之

劉道產為巴西梓潼二郡太守郡人黃公生任肅之張石之等並譙縱餘燼與姻親侯攬羅興等招引白水氏規欲為亂道產誅公生等二十一家宥其餘黨

申怙為北譙梁二郡太守郡境邊接任榛屢被寇掠怙到密知賊來仍伏兵要害出其不意悉皆擒殄

沈叔任為梓潼太守戍涪城東軍既反二郡強宗侯勵羅興聚眾作亂四面雲合遂至萬餘人攻城急叔任東兵不滿五百推布腹心眾莫不為用出擊大破之逆黨

皆平

褚叔度為廣州刺史時桓玄族人開山聚謀掩廣州事  
覺叔度悉平之

蕭思話為青州刺史有亡命司馬朗之元之可之兄弟  
聚黨於東莞發干縣謀為寇亂思話遣北海太守蕭汪  
之討斬之餘黨悉平

趙伯符為竟陵太守時竟陵蠻屢為寇伯符征討悉破  
之繇是有將帥之稱

王玄謨為豫州刺史淮上亡命司馬黑石推立夏侯方  
進為主改姓李名弘以惑眾玄謨討斬之

崔譔武帝永初末為振威將軍東萊太守景平初亡命  
司馬靈期司馬順之千餘人圍東萊譔擊之斬靈期等  
杜瑗為交阯太守時勝遯之為交州刺史遯之在州十  
餘年與林邑累相攻伐遯之將北還林邑王范胡達攻  
破日南九德九真三郡遂圍州城遯之去已遠瑗與第  
三子玄之悉力固守多設權策累戰大破之追討於九

真日南達走還林邑乃以瑗為龍驤將軍交州刺史義  
旗建進號冠軍將軍

沈文季為吳興太守沈登之作亂於吳興文季討斬之  
劉真道為梁南秦二州刺史文帝元嘉十八年氐賊楊  
難當寇漢中真道率軍討破之

檀和之為交州刺史元嘉二十四年十月豫章胡誕反  
殺太守桓陵和之南還至豫章因討平之

南齊柳世隆為江夏內史行郢州事宋昇明元年冬沈

攸之反乘輕舸從數百人先大軍下住白螺州坐胡牀以望其軍有自驕色既至郢以郢城弱小不足攻遣人告世隆曰被太后令當整還都卿既相與奉國想得此意世隆使人答曰東下之師久承聲問郢城小鎮自守而已攸之將去世隆遣人於西渚挑戰攸之果怒令諸軍登岸燒郭邑築長圍百道俱攻顧謂人曰以此攻城何城不尅晝夜攻戰世隆隨宜拒應衆皆披却孝武初下與世隆別曰攸之一旦為變焚夏口舟艦沿流而東則坐



守空城不可制也雖留攻城不可卒拔卿為其內我為其外乃無憂耳至是孝武遣軍主桓敬苟元賓等八軍據西塞令堅壁以待賊疲慮世隆危急遣腹心胡元直潛使入郢城通援軍消息內外並喜郢城既不可攻而平西將軍黃回軍至西陽乘三層艦作羌胡伎沂流而進攸之素失人情本逼以威力初發江陵已有叛者至是稍多攸之日夕乘馬歷營撫慰而去不息攸之大怒名謂軍主曰我被太后令建義下都大事若尅白紗帽

共著耳如其不振朝廷自誅我百口不關餘人此軍人  
叛散皆卿等不以為意我亦不能悉按問自今軍中有  
叛者軍主任其罪於是一人叛遣並去不反莫敢發覺  
咸有異計軍旅大散攸之度魯山岸猶有數十匹騎自  
隨宣令軍中曰荊州城中大有錢可相與還取以為資  
糧郢城未有追軍而散軍畏蠻抄更相聚結可二萬人  
隨攸之將至江陵乃散世隆乃遣軍副劉僧麟道追之  
攸之已死世隆後為湘州刺史永明中湘州蠻陳雙李

搭寇掠郡縣刺史呂安國討之不克世隆到州督衆征討乃平之

王詡為始興內史廣州刺史劉纘為奴所殺詡率郡兵討平之


蕭惠休為徐州刺史明帝武建二年魏軍攻鍾離惠休破之

蕭意為徐州刺史武建二年魏軍圍漢中意拒退之

楊公則為扶風太守荊州刺史巴東王子響構亂公則

率師進討事平遷武寧太守

陳顯達為益州刺史廣漢賊司馬龍駒據郡反顯達討  
平之



冊府元龜卷六百九十三

欽定四庫全書

子部

冊府元龜卷六百九十四

詳校官中書臣吳瓊

侍讀臣孫球覆勘

總校官庶吉士臣何思鈞

校對官典籍臣劉景岳

謄錄監生臣沈廷棟

欽定四庫全書

冊府元龜卷六百九十四

宋 王欽若等撰

牧守部

武功第一

梁曹景宗初為蕭赤斧冠軍中兵參軍領天水太守時

齊建元初蠻寇羣動景宗東西討擊多所擒破

韋叡為豫州刺史領歷陽太守魏衆來寇率州兵擊

走之

鄧元起初仕齊為弘農太守時西陽馬榮率眾緣江寇抄商旅斷絕刺史蕭遙欣使元起率眾討平之後為武寧太守東昏永元末魏軍逼義陽元起自郡援馬蠻帥田孔明附于魏自號郢州刺史寇掠三關窺襲夏口元起率銳卒攻之旬月之間頻陷六城斬獲萬計餘黨悉皆散走乃戍三關

劉季連初仕齊為益州刺史永平二年巴西人雍道晞率羣賊萬餘逼巴西去郡數里道晞稱鎮西將軍號建



義巴西太守魯休烈與涪令李膺嬰城自守季連遣中  
兵參軍李奉伯率衆五千救之奉伯至與郡兵破擒道  
晞斬之涪市

裴邃為廬江太守天監五年魏將呂頗率衆五萬奄來  
攻郡邃率麾下拒破之加右軍將軍

桓和為青冀二州刺史天監五年伐魏和前軍剋胸山  
城

蔡搏為吳興太守天監九年宣城郡吏吳承伯挾妖道

聚衆攻宣城殺太守朱僧勇因轉屠旁縣踰山寇吳興所過皆殘破衆有二萬掩襲郡城東道不習兵草吏民怯擾奔散並請搏避之搏堅守不動募勇敢固郡丞伯盡銳攻搏搏命衆出拒衆於門應手摧破臨陣斬丞伯餘黨悉平加信武將軍

李昶為交州刺史天監十五年十一月昶斬交州反者阮宗孝傳首京師曲赦交州

阮景雋為徐州刺史普通五年八月景雋尅魏童棧九

月又尅睢陵城

夏侯夔為司州刺史大通元年正月夔進軍三關所至皆克捷

徐願為臨賀內史湘衡之界五十餘洞不賓勅令衡州刺史韋粲討之粲委願為都督悉平殄粲啓武帝稱願誠幹降詔褒賞仍加超武將軍征討廣衡二州山賊

安成王秀為荊州刺史先是巴陵馬營之蠻為緣江寇害後軍馬高江產以郢州軍伐之不尅江產死蠻遂盛

秀遣防閣文熾率衆討之燔其林木絕其蹊徑蠻失其  
險期歲而江路清於是州境盜賊遂絕

張齊為巴西太守郡人搆景和聚合蠻蛋鈔斷江路攻  
破金城齊討景和於平昌破之

陸襄為鄱陽內史先是郡民鮮于琛服食修道法常入  
山採藥拾得五色幡旌又于地下得石璽竊怪之琛先  
與妻別室望琛所處常有異氣益以為神大同元年遂  
結其門徒殺廣晉令王筠號上願元年署置官屬其黨

轉相誑惑有衆萬餘人將出攻郡襄先令率民吏修城  
隍為備禦及賊至連戰破之生獲琛餘衆逃散

蘭欽為北梁州刺史大同元年十一月攻漢中尅之後  
為衡州刺史兼廣州因破俚帥陳文徹兄弟並擒之

新喻侯映為廣州刺史大同十年廣州人盧子畧反映  
討平之

楊牒為交州刺史中大同元年正月尅交阯嘉寧城賊  
李賁竄入獠洞交州平

陳慶之為北兗州刺史會有妖賊沙門僧強自稱為帝  
土豪蔡伯龍起兵應之僧強頗知幻術更相扇惑衆至  
三萬攻陷北徐州濟陰太守楊起文棄城走鍾離太守  
單希寶見害使慶之討焉慶之受命而行曾未浹辰斬  
伯龍僧強傳其首

裴之高為梁郡太守時魏汝陰來附勅之高應接仍假  
節飈勇將軍潁州刺史士民夜反踰城而入之高率家  
僮與麾下奮擊賊乃散走

杜懷寶為梁州刺史進督華州值秦州所部武興氏王  
楊紹反懷寶擊破之

王僉為建安太守山酋方善謝稀聚徒依險屢為民害  
僉潛設方畧率衆平之有詔褒美頒示州郡

陳周敷仕梁為寧州刺史熊曇朗之殺周文育據豫章  
將兵萬餘人襲敷徑至城下敷與戰大破之追奔五十  
餘里曇朗單馬獲免盡收其軍實曇朗走巴山郡收合  
餘黨敷因與周迪黃法氈等進兵圍曇朗屠之

周文昭仕梁為弋陽太守侯景之亂元帝承制改授西陽太守封西陽縣伯景遣子思穆據守齊安文昭率驍勇襲破思穆擒斬之以功授持節高州刺史

周迪為江州刺史武帝永定二年熊曇朗殺都督周文育舉兵反文帝天嘉元年迪平南中斬曇朗傳首京師後魏元延為并州刺史道武皇始二年并州守將封真率其種族與徒河為逆將攻延延討平之

趙德為趙郡太守神瑞二年司馬順之入恒山流言惑



衆稱受天帝命年二十五應為人君遂聚黨於封龍山  
德執送京師斬之

許宗之為定州刺史乞佛成龍為并州刺史文成太安  
二年丁零數千家亡匿井陘山聚為寇賊詔宗之成龍  
等討平之

武昌王平原為齊州刺史孝文延興元年妖賊司馬小  
君聚衆反於平陵平原討擒之

尉雒侯為秦益二州刺史太和元年秦州路畧陽民王

元壽聚衆五千餘家自號為衝天王維侯討破元壽獲其妻子送京師

李肅為幽州刺史太和二十三年州民王惠定聚衆反自稱明法皇帝肅捕斬之

苟頽為司空孝文行幸三州頽留守京師沙門法秀謀反頽率禁旅收掩畢獲內外晏然

桓道進為荊州刺史宣武景明元年攻南齊下柞茂拔之降者三千餘戶

田益宗為東豫州刺史景明元年破齊將吳子陽鄧元起于長風

楊大眼為東荊州刺史正始元年大破羣蠻樊季安等  
薛真度為揚州刺史正始二年大破梁將王超宗俘斬  
三千

司馬靈壽為陳郡太守宋師侵境詔靈壽招引義士得  
二千餘人平公安頡破虎牢滑臺雒陽三城徙五百餘  
家入河內又從討蠕蠕西征涼州所在著功

薛懷吉延昌中為梁州刺史南秦氏攻逼武興懷吉遣長史崔纂司馬韋弼別駕范珣擊平之進號右將軍

桓叔興為南荊州刺史延昌三年大破梁軍于九山斬其虎旅將軍蔡令孫冠軍將軍席世興貞義將軍藍次孫

魏子建為東益州刺史孝明正光五年招降南秦氏民復六郡十二州又斬賊王韓祖香南秦賊王張良命畏逼乃造降於蕭寶寅孝昌元年莫折念生遣都督楊鮐

梁下辯姜齊等攻仇池郡城子建遣將盛遷擊破之斬  
下辯齊等首

安樂王鑒為青州刺史孝昌元年齊州清河民崔畜殺  
太守董遵廣川民傅堆執太守劉莽反鑒討平之

呂羅漢為秦益二州刺史涇州民張羗郎扇惑隴東聚  
衆千餘人州軍討之不能制羅漢率步騎一千擊羗郎  
擒之

武昌悼王鑒為徐州刺史梁角城戍主柴慶宗以城內

附鑿遣淮南太守吳秦生率千餘赴之梁淮陰援軍已  
來斷路秦生屢戰破之乘勝而進遂剋角城

李元護為齊州刺史入朝以州民聊世明圖為不軌元  
護馳還歷城至即擒殄誅戮所加微為濫酷

彭城王勰子劭為青州刺史齊州民劉均房頃等扇動  
三齊梁遣彭城郡王辯等搔擾邊陸劭頻有防拒之効  
陸希質為膠州刺史梁武帝遣將率數萬從郁州浮海  
據島來侵州界希質討破之

鄭輯之為黎陽太守屬元顥入雒令其舅范遵鎮守滑臺與輯之隔岸相對遵潛軍夜度規欲掩襲輯之率厲城民拒河擊之遵遂遁走朝廷嘉之除司州別駕

崔元珍為平陽太守頻破胡賊郡內以安

楊椿初為梁州刺史以母老解還後武都氏楊會反假椿節冠軍都督西征諸軍事行梁州刺史與軍司羊祉討破之

房亮為平原太守時冀州刺史京兆王愉據州反平原

界在河北與愉接境愉乃遣人說亮啖以榮利亮即斬其使人發兵防捍愉怒遣其大將張靈和率衆攻亮亮督厲兵民喻以逆順出城拒擊大破之

路思令為南冀州刺史假平東將軍都督時葛榮遣其清河太守李虎據高唐城以招叛民思令乃命麾下并率鄉曲潛軍夜往出其不意遂大破之徐乃收衆南還潘永基為南徐州刺史梁將曹世宗馬洪武等率衆來寇永基出討破之



奚康生為南青州刺史梁武帝自郁州遣軍主徐濟寇  
邊康生率將出破之擒濟賞帛千疋

宋翻為兗州刺史梁將先據荆山規將虜竊屬壽春淪  
陷遂乘勢徑趣項城翻遣將成僧達潛軍討襲頻戰破  
之自是州境帖然

張普惠為東豫州刺史梁將胡廣來寇安陽軍主陳明  
祖等脇白沙鹿城二戍梁又遣定州刺史田超秀田僧  
達等竊陷石頭戍徑據安陂城郢州新塘梁軍近在州

西數十里普惠前後命將拒戰並破之

李賢為原州刺史茹茹圍逼州城剽掠居民驅擁畜牧賢欲戰大都督王德猶豫未決賢固請德乃從之賢勒兵將出賊密知之乃引軍退賢因率騎士追擊斬二百餘級捕虜百餘人獲駝馬牛羊二萬頭財物不可勝計所掠之人還得安堵

李孝怡為魏郡太守時相州刺史中山王熙據鄴起兵孝怡陰結募城民與熙長史柳元章別駕游荆之等率

衆擒熙賞爵昌樂伯

裴果為龍州刺史州人張遁李祐驅率百姓圍逼州城時糧仗皆闕兵士又寡果設方畧以拒之賊便退走於是出兵追擊累戰破之旬日之間州境清晏

叔孫建為相州刺史饑胡劉虎等聚黨反叛公孫表等為虎所敗建督表等以討虎斬首萬餘級餘衆奔走投沁水而死水為不流虜其十餘萬口

蔡雋為濟州刺史前青州刺史梁侯反攻掠青齊濟州

雋討平之又胡遷等據兗州作逆雋與齊州刺史尉景  
討平之

北齊堯奮為南汾州刺史胡夷畏憚之西魏行臺薛崇  
禮舉衆攻奮與戰大破之崇禮兄弟乞降送於相府轉  
奮驃騎將軍左光祿大夫潁州刺史

堯雄在魏為豫州刺史梁將李洪芝王當伯襲破平鄉  
城侵擾州境雄設伏要擊生擒洪芝當伯等俘獲甚衆  
梁司州刺史陳慶之復率衆逼州城雄出與戰所向披

靡身被二創壯氣益厲慶之敗棄輜重走

高季式在魏為濟州刺史天平中山東舊賊劉盤陔史  
明曜等攻劫道路剽掠村邑齊兗青徐四州患之歷政  
不能討季式至皆破滅之尋有濮陽民杜靈椿等攻剽  
野聚衆將萬人季式遣騎三百一戰擒之又陽平路叔  
文徒黨緒顯等立營柵為亂季式討平之又有羣賊破  
南河郡季式遣兵臨之應時斬戮自茲以後遠近清晏  
王峻為營州刺史茹茹主菴羅辰率其餘黨東徙峻度

其必來預為之備未幾菴羅辰到頓軍城西峻乃設奇伏大破之獲其名王郁久間豆拔提等數十人送於京師菴羅辰於此遁走先是刺史陸士茂詐殺室韋八百餘人因此朝貢遂絕至是峻分命將士要其行路室韋果至大破之虜其酋帥而還因厚加恩禮放遣之室韋遂獻誠款朝貢不絕峻有力焉

任城王潛為青州刺史後主武平中州人崔蔚波等夜襲州城潛部分倉卒之際咸得齊整擊賊大破之

後周寇僞為涼州刺史時梁遣其將曹琰之鎮魏興繼日版築琰之屢擾疆場邊民患之僞遣長史杜休道率兵攻克其城并擒琰之琰之即梁大將景宗之季弟也於是梁人憚焉

郭彥為澧州刺史時齊南安城主馮顯密遣使歸降其衆未之知也柱國宇文貴令彥率兵應接齊人先令顯率所部送糧南下彥懼其衆不從命乃於路邀之顯因得自拔其衆果拒戰彥縱兵奮擊並虜獲之以南安無

備即引兵掩襲顯外兵參軍鄒紹既為彥所獲因請為鄉導彥遂夜至城下令紹詐稱顯歸門者開門待之彥引兵而入遂有其城俘獲三千餘人晉公護嘉之

史寧在西魏為車騎將軍行涇州事時賊帥莫折後熾寇掠居民寧率州兵與行原州事李賢討破之轉東義州刺史寧僅得入州梨苟亦至寧逆擊破之斬其雄安郡守馮善道轉涼州刺史寧未至而前刺史宇文仲和據州作亂詔遣獨孤信率兵與寧討之寧先至涼州為



陳禍福城中吏民皆相率降附仲和仍據城不下尋亦克之加車騎大將軍儀同三司

宇文神舉為并州刺史所部東壽陽縣土人相聚為盜率其衆五千人來襲州城神舉以兵討平之

韓褒為汾州刺史州界北接太原當千里徑先是齊寇數入民廢耕桑前後刺史莫能防捍褒乃不下屬縣民既不及設備以故多被抄掠齊人喜相謂曰汾州不覺吾至先未集兵今者之還必莫能追躡我矣繇是益懈

不為營壘褒已先勒精銳伏止山中分據險阻邀其歸路乘其衆怠縱伏擊之盡獲其衆故獲生口者並囚送京師褒因是奏曰所獲賊衆不足為多俘而辱之但益其忿耳請一切放還以德報怨有詔許焉自此抄兵頗息

杜杲為修武郡守屬鳳州人仇周貢等搆亂攻逼修武杲信洽於民部內遂無叛者尋而開府趙昶督諸軍進討杲率郡兵與昶合勢遂破平之

梁臺為平涼郡守時莫折後熾結聚輕剽寇掠居民刺  
史史寧討之歷時不克臺陳賊形勢無論攻取之策寧  
善而從之遂破賊徒

和洪為龍州刺史先是蠻人任公忻李國立等聚亂刺  
史獨孤善力不能禦朝議以洪有武畧代善為刺史月  
餘擒公忻國立皆斬首梟之餘黨悉平

楊文思為武都太守十姓獠反文思討平之復治冀州  
事黨項羌叛文思率州兵討平之進擊資中武康隆山

生獠及東山獠戎屬並破之

趙昶為安夷郡守時屬軍機科發切急氏情難之相率謀叛昶乃潛遣吏說離間其情因其攜貳遂輕往臨之羣氏不知所為咸來見昶乃收其首逆者二十餘人斬之餘衆遂定又為武州刺史興州人段吒及氏酋姜多復反攻沒郡縣昶討斬之

賀若誼為熊州刺史平齊之役誼率兵出函谷先據雒陽即拜雒州刺史

陸騰為江州刺史明帝初陵眉戎江資卽新遂八州夷  
夏及合州民張瑜兄弟並反衆數萬人攻破郡縣騰率  
兵討之轉潼州刺史後為龍州刺史州民李廣嗣李武  
等據憑巖險以為堡壁招集不逞之徒攻劫郡縣歷政  
不能治騰密令多造飛梯身率麾下夜往掩襲未明四  
面俱上遂破之執廣嗣等於鼓下其黨有任公忻者更  
聚徒衆圍逼州城乃語騰曰但免廣嗣及武即散兵請  
罪騰謂將士曰吾若不殺廣嗣等可謂隳軍實而長寇

讎事之不可者也公忻豎子乃敢要人即斬廣嗣及武以首示之賊徒沮氣於是出兵奮擊盡獲之

隋趙賢通初仕後周為陝州刺史蠻酋向天王聚眾作亂以兵攻信陵秭歸賢通勒所部五百人出其不意襲擊破之二郡獲全時周人於江南岸置安蜀城以禦陳屬霖雨數旬城頽百餘步蠻酋鄭南鄉叛引陳將吳明徹欲掩安屬議者皆勸賢通益修守禦賢通曰不然吾自有以安之乃遣使說誘江外生蠻同武陽令乘虛掩

襲所居獲其南鄉父母妻子南鄉聞之其黨各散陳兵  
遂退明年吳明徹屢為寇患賢通勒兵禦之前後十六  
戰每挫其鋒獲陳裨將覃罔王足子吳朗等三人斬首  
一百六十級以功封開府儀同三司遷荊州總管長史  
元景山為建州刺史時高祖為丞相司馬消難之以鄖  
州入陳也遣將樊毅馬傑等來援景山率輕騎五百馳  
赴之毅等懼掠居民而遁景山追之一日一夜行三百  
餘里與毅戰於漳口三合皆克毅等退保甌山鎮其城

邑消難所陷者悉平之拜安州總管桐栢山蠻相聚為亂景山復擊平之及高祖受禪拜景山亳州總管陳人張景遵以淮南內屬為陳將任蠻奴所攻破其數柵景山發譙潁兵援之蠻奴引軍而退徵為候正

劉宏彭城人初仕後周為郡太守尉遲迴之亂遣其將席毗寇掠徐兗宏勒兵拒之以功授儀同

元亨為雒州刺史尉遲迴之亂潁陽人梁康邢流水等舉兵應迴旬月之間衆至萬餘州治中王文舒潛與梁



康相結將圖亨亨陰知其謀乃選關中兵得二千人為左右執文舒斬之以兵襲擊梁康邢流水皆破之

豆盧通為北徐州刺史尉遲迴之亂遣其所署莒州刺史烏丸尼率眾來攻通逆討破之賜帛八百段進位大將軍

蘇沙羅為資州刺史冉尨羌作亂攻汶山金川二鎮沙羅率兵擊破之授邛州刺史

韋冲檢校括州事時東陽賊帥陶子定吳州賊帥羅方

慧並聚衆為亂攻圍婺州永康烏程諸縣冲率兵擊破之

張須陁為齊郡丞賊帥王薄聚結亡命數萬人寇掠郡境官軍擊之多不利須陁發兵拒之薄遂引軍南轉掠魯郡境須陁躡之及於岱山之下薄恃驟勝不設備須陁選精銳出其不意擊之薄衆大潰因乘勝斬首數千級薄收合亡散得萬餘人將北渡河須陁追之至臨邑復破之斬五千餘級獲六畜萬計薄復北連豆子航賊

孫宣雅石祗閣郝孝德等衆十餘萬攻章邱須陁遣舟  
師斷其津濟親帥馬步二萬襲擊大破之賊徒散走既  
至津梁復為舟師所拒前後獲其家累輜重不可勝計  
其年賊帥裴長才石子河等衆二萬奄至城下縱兵大  
掠須陁未暇集兵親率五騎與戰賊競赴之圍百餘重  
身中數創勇氣彌厲會城中兵至賊稍却須陁督兵復  
戰長才敗走後數旬賊帥秦君宏方預等合軍圍北海  
兵鋒甚銳須陁謂官屬曰賊自恃強謂我不敢救吾今

速去破之必矣於是簡精兵倍道而進賊果無備擊大破之斬數萬級復獲輜重三千兩又賊左孝友衆將十萬屯於蹲狗山湏陁列八營以逼之復分兵扼其要害孝友窘迫面縛來降其黨解散王良鄭大彪李晚等衆各萬計湏陁悉討平之威振東夏以功遷齊郡通守領河南道十二郡黜陟討捕大使

楊善會為清河郡丞賊帥張金稱以輕兵掠寇氏善會與平原通守楊元宏步騎數萬衆襲其不意武賁郎將

王辯軍亦至金稱釋寇氏來援因與辯戰辯不利善會  
選精銳五百赴之所當皆靡辯軍復進賊退守本營諸  
軍各還于時山東思亂從盜如市郡縣微弱陷沒相繼  
能抗賊者惟善會而已前後七百餘陣未嘗負敗每憾  
衆寡懸殊未能滅賊會太僕楊義臣討金稱復為賊所  
敗退保臨清取善會之策頻與決戰賊乃退走乘勝遂  
破其營盡俘其衆金稱將數百人遁逃後歸漳南招集  
餘黨善會追捕斬之傳首行在所煬帝賜以尚方甲稍

弓劍進拜清河通守其年從楊義臣斬漳南賊高士達  
傳首江都宮帝下詔褒揚之士達所部將竇建德自號  
長樂王來攻信都臨清賊王安阻兵數千與建德相影  
響善會襲安斬之

陳孝意為雁門郡丞煬帝幸江都馬邑劉武周殺太守  
王仁恭舉兵作亂孝意率兵與武賁郎將王智辯討之  
戰於下館城反為所敗武周遂轉攻傍縣百姓怵怛將  
懷叛逆前郡丞楊長仁雁門令王確等並桀黠為無賴

所歸謀應武周孝意陰知之族滅其家郡中戰慄莫敢異志俄而武周來攻孝意拒之每致尅捷

慕容三藏為疊州總管黨項羌時有反叛三藏隨便討平之部內夷夏咸得安輯

楊義臣為檢校趙郡太守妖賊向海公聚眾作亂寇扶風安定間義臣奉詔擊平之

王世充為江都郡丞領江都宮監及吳元感反吳人朱燮晉陵人管宗起兵江南以應之自稱將軍擁眾十餘

萬煬帝遣將軍吐萬緒魚俱羅討之不能克克募江都  
萬餘人頻擊破之每有克捷必歸功於下所獲軍實皆  
推與士卒身無所受繇此人爭為用功最居多齊郡賊  
帥孟讓自長白山寇掠諸郡至盱眙有衆十餘萬克以  
兵拒之而羸師示弱保都梁山為五柵相持不戰後因  
其解弛出兵奮擊大破之乘勝盡滅賊讓乃以數十騎  
遁去斬首萬人六畜軍資莫不盡獲帝以克有將帥才  
畧始遣領兵討諸小盜所向皆破之



郭絢為涿郡通守山東盜賊起絢逐捕之多所剋獲時諸郡無復完者惟涿郡獨全

唐蕭瑀初仕隋為河池郡守既至有山賊萬餘人寇暴縱橫瑀前募勇敢之士設竒而擊之在陣斬賊帥而降其衆所獲財畜咸賞有功繇是人竭其力續以薛舉遣衆數萬侵掠郡境瑀敗之自後諸賊莫敢進郡中復安邱和隋末交趾太守會煬帝為宇文化及所弑鴻臚卿甯長真以鬱林始安之地附於蕭銑馬蓋以蒼梧高梁

珠崖番禺之地附於林士宏各遣人召之和初未知隋  
亡皆不就林邑之西諸國並遣遺和明珠文犀金寶之  
物富埒王者銳聞利之遣將長真率百越之衆渡海侵  
和和遣高士廉率交愛首領擊之長真退走境內獲全  
郡中樹碑頌德

于德秀武德中為慶州刺史梁師都來侵德秀擊却之  
楊則為靈州長史梁師都遣兵侵靈州則擊走之

任環為穀州刺史王世克遣其將郭士衡步騎數千來

侵環逆擊大破之俘斬且盡

張善為伊州總管武德二年王世克遣其將王世隆寇伊州善擊走之

丁伯德為西濟州刺史王世克遣其將來侵伯德擊破之

許紹為陝州刺史蕭銑遣其將楊道生來侵紹擊破之郭仁勗為同州留守胡賊掠同州之白水縣坊仁勗討平之

開緒為朔州刺史劉武周遣其將牛讓來侵開緒擊走之

獨孤開遠為遼州刺史劉黑闥擾亂山東所在多陷沒開遠率厲百姓保其州境屢將兵斷賊糧道賊竟不敢侵逼

公孫武達貞觀初為肅州刺史歲餘突厥數千騎輜重萬餘人侵肅州欲戰虜稍却急攻之遂大潰犄之於張掖河又命軍士於上流以械渡兵擊其餘衆賊半濟兩

岸夾攻之斬溺畧盡降璽書慰勉之拜右監門將軍又突厥犯西偏武達與甘州刺史成仁重擊大破之俘其男女千餘口雜畜數千計

李道彥貞觀中為岷州都督吐谷渾來寇道彥擊走之執其名王二人俘斬七百餘級

崔義元以高宗永徽中為婺州刺史時睦州女子陳碩真作亂寇東陽義元發兵拒之百姓訛言碩真有神靈犯其兵馬無不滅門士衆恟懼司功叅軍崔元籍曰起

兵仗順猶懼無成此乃妖誑豈得能久義元乃遣元籍  
為先鋒自率官吏繼進至下淮戍擒其間諜數十人夜  
有流星墜賊營詰朝進擊之左右以楯蔽箭義元曰刺  
史尚欲避箭誰肯致死遽令去之於是士卒齊力賊衆  
大潰斬首數千級餘衆悉許其歸進至睦州界歸者萬  
計房仁裕之軍與義元相會遂獲碩真等斬之餘黨悉  
平

劉鱗為南海太守以元宗天寶三載破海賊吳令光永

嘉郡平

顏杲卿為恒山太守天寶十四載安祿山陷東都杲卿  
與長史袁履謙賈深等殺賊將李欽湊執賊將何千年  
高邈送京師

顏真卿天寶末為平原太守安祿山遣其將李欽湊高  
邈何千年等守土門真卿從兄弟恒山太守杲卿與長  
史袁履謙殺欽湊邈擒千年送京師土門既開十七郡  
同日歸順共推真卿為帥得兵二十餘萬橫絕燕趙詔

加真卿戶部侍郎依前平原太守

薛景仙以肅宗至德初為扶風太守安祿山逆賊曳落河兵數萬人來寇景仙與將軍康景龍率百姓斬其渠帥十餘人餘皆奔走

武齊莊為交城太守破賊安定遠等五千餘衆盡獲其軍資器械

韋倫為商州刺史荆襄等道租庸使會襄州裨將康楚元張嘉延擁衆為叛兇黨萬餘人自稱東楚義王襄州



刺史王政棄城遁走嘉延又南襲破江陵漢沔饋運阻  
絕朝廷旰食倫乃調兵駐鎮州界楚元兇黨有來降者  
必厚加賞數日後楚元衆頗怠倫進軍擊之生擒楚元  
以獻餘衆悉走收租庸錢物僅二百萬貫並免失墜荆  
襄二州平

高晃為汝州刺史破逆賊史思明賊衆三千生擒賊帥  
八十人及馳馬器械不可勝數明年又破逆賊五千衆  
生擒三千人

李抱玉為澤州刺史史思明圖澤州抱玉夜出軍大破之

邢濟寶應初為桂州刺史討西原賊帥吳功曹等平之  
裴虬為道州刺史代宗永泰五年湖南都團練使崔灌  
為其兵馬使玠所殺玠據潭州虬出軍討玠平之

李勉為江西觀察使賊帥陳莊連陷江西州縣偏將呂  
太一武日昇相繼背叛勉與諸道兵戰悉攻平之

王翽大厯中為容州刺史初安祿山反詔徵嶺南募兵

命南陽太守魯炆統之以遏南侵魯與賊戰敗于葉縣  
嶺南山洞夷獠乘此相聚為亂其首領梁宗牽自號平  
南十道大都統及其黨帥覃問等因誘西原賊張侯夏  
永攻陷城邑偷據容州前後陳仁琇李抗侯金儀耿慎  
惑元結長孫全緒等容州刺史皆寓理藤州或居梧州  
者及胡至藤州言於衆曰吾為容州刺史安得寄理他  
邑乃出私財募將健許奏以高官厚勲以是人各盡力  
未數日有斬賊帥歐陽珪馳往廣州見節度李勉求兵

應接勉曰容州陷賊已久賊勢且強必難圖也若速討  
祇自敗耳終無成功翊復請曰大夫若不能命帥但謀  
告諸州揚言三千兵援助真藉為勢耳勉然之翊乃手  
札告諭義州刺史陳仁權藤州刺史李曉庭等盟約討  
賊翊復募三千餘人同力鏖戰至六年三月遂剋復容  
州故城賊猶壓境戰日數合節度使牒止翊用兵翊慮  
惑將士匿其牒奮起士卒大破賊數萬衆擒其大首領  
梁宗牽賊遁數百里外盡復容州故境翊發表以聞奏

置順州以遏餘寇前後大小百餘戰生擒賊帥上獻者七十餘人累加銀青光祿大夫兼御史中丞克招討處置使翊又令其將張利用李實等分討襲西原遂收復鬱林諸州部內漸安後因哥舒晃殺節度使呂崇賁嶺南復亂翊遣大將李實悉所管兵赴援廣州西原賊帥覃問復招集其黨白容管兵馬盡趨廣州可襲取之於是悉衆奄至翊又力戰大破之生擒覃問代宗累遣中使慰問加翊金紫光祿大夫

于邵為益州刺史時歲儉夷獠相聚山澤為盜數千萬人來圍州城邵撫勵州兵與之拒戰凡旬有二日間遣使說喻示以善惡山盜邀邵出乃以儒服出城致之不疑因皆降之節度使李抱玉以聞邵遷梓州刺史

張萬福攝廬壽二州刺史州送租賦詣京師至潁州界為盜所劫萬福領輕兵入潁州界討之賊不意萬福至忙迫不得戰萬福悉聚而誅之盡得其所亡物并得前後所掠人妻子財物牛馬等萬福悉還其家不能自致

者萬福給船乘以遣尋拜壽州刺史淮南節度副使為節度使崔圓所忌失刺史改鴻臚卿以節度副使將千人鎮壽州萬福不以為憾許杲以平盧行軍司馬將三千人駐濠州不去有窺淮南意圓令萬福攝濠州刺史杲聞即提卒去止當塗陳莊賊陷舒州圓又以萬福為舒州刺史督淮南岸盜賊連破其黨大曆三年召赴京師代宗謂曰聞卿名欲一識卿且將累卿以許杲焉萬福拜謝因前曰陛下以許杲召臣如河北諸將叛欲以

屬何人代宗笑謂曰且與吾了許杲事方當大用卿以  
為和州刺史行營防禦使督淮南岸盜賊至州杲懼移  
軍上元杲至楚州大掠節度使韋元甫命萬福追討之  
未至淮陰杲為其將康自勸所逐自勸擁兵繼掠循淮  
南東萬福倍道追而殺之免者十二三盡得擄掠金帛  
婦女等皆護致其家軍還元甫將厚賞將士萬福曰官  
健常虛費衣糧無所事今乃一小煩之不足過賞請用  
三之一代宗發詔以勞之賜衣一襲禁錦十雙



郝士美以德宗建中年為黔中觀察使時溪州賊帥向子琪連結夷蠻控據山洞衆號七八千士美設奇畧討平之詔書勞慰加檢校右常侍封高平郡公又為鄂岳觀察使討伊慎有功授安黃節度

韓滉為潤州刺史李希烈陷汴州滉擇其銳卒令裨將李長榮王西曜與宣武軍節度使劉元佐犄角討襲解寧陵之圍復宋汴之路滉功為多

李澄為滑州刺史破李希烈逆衆於鄭州南境擒賊黨

四十七人戎器二千餘事

辛秘以憲宗元和中為湖州刺史屬李錡阻命將收支郡以大將守之遂分兵取四州刺史蘇常杭睦或先以戰破或先被拘執賊黨以為秘儒懦甚易之秘密遣牙門將邱知二勒兵數百人候賊將動逆戰大破之知二中流矢墜馬起而復戰斬其將焚其營一州遂安賊平以功賜金紫繇是僉以秘材任將帥

李憲為絳州刺史澤州沁水縣妖賊李有經聚眾三千

餘人來寇翼城縣憲以州兵及神策鎮軍擊破之擒有  
經以獻

李聽為楚州刺史李師道反鄆人素易淮南之卒聽潛  
訓練出其不意趨海州據險要破沭陽兵降朐山戍懷  
仁東海兩城望風乞降山東平以功授夏州節度

竇易直以穆宗長慶中為潤州刺史部將王國清以所  
部八百人為亂易直自將牙兵拒之國清衆潰斬於京  
口餘黨連親兵復為亂皆誅之

裴誼以文宗太和中為江南西道觀察使誼奏吉州破赤石徐莊等洞賊戮殺擒獲共二百三十六人收賊柵七所器械三千二百三十事水陸田四百頃牛馬等四百七十餘頭

梁王敬瑛唐末為潁州刺史州境荒饑大寇繼至黃巢數十萬衆聚寨於州南敬瑛極力抗禦逾旬而退俄又秦宗權之衆陵暴益甚合圍攻壁皆力屈而去蔡賊復遣將刁君務以萬衆來逼敬瑛列陣當之身先馳突殺

敵甚多繇是竟全郡壘遠近歸附及淮人不恭太祖屢以大軍南渡路繇州境敬堯悉心供億太祖深嘉之

張敬方開平中為均州刺史時襄陽小將王永殺留後王班間使附于蜀房州聞之亦叛敬方能完其郡又移兵剋房陵

後唐袁建豐為相州刺史領相州軍事行營在外指揮使孟謙據城以叛建豐引兵討平之改隰州刺史

索自通為京兆尹西京留守屬河中指揮使楊彥溫據

河中作亂自通率師討平之

晉馬全節後唐清泰初為全州防禦使會蜀軍攻其州城兵纔及千人兵馬都監陳隱懼託以他事出城領三百人順流而逃賊既盛人情憂沮全節悉出其家財以給士復出奇拒戰以死繼之賊退朝廷嘉其功

孫彥韜仕後唐為濮州刺史清泰末羣寇入郡郡人大擾彥韜率帳下百人一呼破之人皆感之

劉遂清為易州刺史時王都與契丹連結將使遏其寇

衡既至郡大有禦侮之畧境內賴焉

周許遷為隰州刺史以太祖廣順元年十二月朝見賜  
襲衣金帶銀鞍馬獎守城之功也

冊府元龜卷六百九十四